

西安府志

第二函
第八冊



西安府志卷第二十七

人物志

關中居四極之上游華嶽洪河篤生人傑數千餘年自帝王將相聖賢豪傑貞元蔚會莫盛於斯通志分著聖賢名臣廉能勇略直諫忠節孝義等名頗嫌支蔓其位置亦多未安今於名世之士略叙朝代併稱列傳餘若儒林文苑隱逸節烈凡一節之美者仍爲別著凡十四卷至所載人物事實閒有不盡互見大事志卷中以省繁芳亦史家往例也

周

周公尚書君陳師保萬民民懷其德洛誥惟公德明光于

上下勤施于四方旁作穆穆迓衡史記魯世家周公旦者武王弟也文王在時旦爲子孝篤仁義于羣子武王卽位旦輔翼武王九年東伐至盟津十一年伐紂至牧野作牧誓破殷殺紂周公把大鉞召公把小鉞釁社告紂之罪於天及殷民封紂子武庚祿父管叔傅之以續殷祀武王有疾不豫羣臣懼周公乃自以爲贊設三壇載璧秉圭告於太王王季文王卜曰吉藏其冊金縢匱中其後武王崩成王少周公恐天下畔乃踐祚代成王攝行政當國管叔及其羣弟流言於國曰公將不利於成王周公卒相成王而使其子伯禽就封於魯管蔡武庚等果率淮夷反周公奉命興師東伐作大誥誅管叔殺武庚放蔡叔收殷餘民以

封康叔於衛封微子於宋以奉殷祀寧淮夷東土二年畢
定諸侯咸服宗周成王七年周公營雒邑成王長周公還
政北而就臣位躬躬如畏然初成王少時病周公自撈其
蚤沉之河以祝於神亦藏其冊於府成王病有瘳及成王
用事人或譖周公周公奔楚成王發府見周公禱書乃泣
反周公周公歸恐成王壯治有所淫佚乃作多士毋逸官
政未次序作周官官別其宜作立政以便百姓卒葬于畢

按姬宗世譜周公長子伯禽封魯次子仲翼畱於西周
公歿襲爵周公三代子佑四代子祿五代子惠六代子
宗七代子圉八代子璠九代子盈十代子師十一代子
穆十二代子敬十三代子勤十四代子質十五代子黑

肩俱襲公爵黑肩事桓王桓王次子克有寵於王屬諸
周公桓王崩長子陀立是爲莊王王奪公爵延及二十
五世孫絺雅病廢疾考王封其弟揭於王城爲周桓公
桓公生威公威公生惠公以王城傳長子武公以
鞏邑封次子班班號東周惠公武號西周武公愼靚王
以上皆東居至赧王微弱復遷王城依西周武公赧王
崩周民東亡就鞏秦遷西周公於愚狐聚東周公於陽
人聚使奉周祀凡三十四世其後可考者漢元鼎四年
封三十六代孫姬嘉爲周子南君元封三年封嘉弟昭
爲承休侯元始四年封三十九代孫姬憲爲鄭公東漢
建武三年封四十代孫姬觀爲衛公晉泰始三年封四

十五代孫姬章爲嗣聖公北魏天興二年封四十八代
孫姬郢爲永成侯子武襲隋開皇九年封五十二代孫
姬勲爲昭德侯唐武德二年封五十三代孫姬順爲咸
陽公宋乾德五年封五十八代孫姬邠爲周南公景祐
二年封六十代孫姬紹爲郢公元武宗至大元年徵周
公後六十四代孫姬重郁以忤相臣脫虎脫停封重郁
子二人豐鎬於至正八年僑寓河東豐子二文灼文輝

文灼之後四世

莊尚疇燕
琅復周

至養學於明萬歷丁亥返咸

陽養學之後五世

應秋光富士彬社紹先爲正支光耀
蘭芳熊飛璠璠士廉姚富祐玘紹

倉璠皆
旁支

至肇勲肇勲弟四

肇璠肇璠肇璠
肇王璠倉

凡七十

七代乾隆戊戌中丞畢公以

公墓在咸陽清釐封域禁止樵采并爲查詢譜牒咨訪後裔僅有奉祀生一人竊謂歷聖相傳道統自

周公承之官禮制作爰象演辭開帝王萬世之基闡義聖精微之蘊我

朝右文重道加意表章康熙二十四年以公子伯禽少子食采東野者爲東野氏奉

旨世襲五經博士奉祀曲阜祠宇今咸陽爲

公祠墓所在且文武成康四王陵寢咸在於是奏請

皇上加恩照東野氏例添設五經博士一員予以世襲俾繼

禩之宗得延聖澤以崇禋祀經禮部議準孔氏衢州朱

子婺源之例增設世襲翰林院五經博士一員仰蒙

俞允因按世譜嫡支以姬肇勳承襲

熙朝崇道之盛典

聖主延賞之隆恩實與日月同其炳煥而中丞之奏請亦不朽之盛事也因爲詳著於編俾後來有所考焉

畢公高書畢命惟公懋德克勤小物弼亮四世正色率下罔不祇師言嘉績多於先王子小子垂拱仰成正義晉語說文王之事云重之以周召畢榮則畢公於文王之世已爲大臣是文武成康四世爲公卿也史記魏世家畢公高與周同姓武王伐紂高封於畢索隱左傳富辰言文王之子十六國有畢原豐郇言畢公是文王之子馬融亦云畢毛庶子其後絕封爲庶人

榮伯書序成王既伐東夷肅慎來賀王俾榮伯作賄肅慎之命正義晉語云文王諏於蔡原訪於莘尹重之以周召畢榮榮於文王之時名次畢公之下是大臣也未知此時榮伯是彼榮公否史記周本紀註馬融曰榮伯周同姓畿內諸侯爲卿大夫也

君陳書君陳惟爾令德孝恭惟孝友于兄弟克施有政命汝尹茲東郊敬哉往慎乃司茲率厥常懋昭周公之訓惟民其乂竹書紀年成王十一年王命周平公治東都注周平公卽君陳周公之子伯禽之弟

祭公謀父左傳穆王周行天下必有車轍馬跡焉祭公謀父作祈招之詩以止王心王是以獲沒於祗宮其詩曰祈

招之惓惓式昭德音思我王度式如玉式如金形民之力
而無醉飽之心國語穆王將征犬戎祭公謀父諫曰先王
耀德不觀兵夫先王之制甸服者祭侯服者祀賓服者享
要服者貢荒服者王日祭月祀時享歲貢終王今自大畢
伯仕之終也犬戎氏以其職來王天子曰予必以不享征
之且觀之兵無乃廢先王之訓而王幾頓乎王不聽遂征
之汲冢周書王若曰公不豫公其告予懿德祭公曰汝無
以戾缺罪疾喪時二王大功汝無以嬖御固莊后汝無以
小謀敗大作汝無以嬖御士疾大夫卿士汝無以家相亂
王室而莫恤其外尚皆以時中又萬國史記周本紀註韋
昭曰祭畿內之國周公之後爲王卿士謀父字也

鄆侯左傳畢原鄆郇文之昭也竹書紀年成王十有九年巡狩歸周正百官黜鄆侯

秦獻公史記獻公二年城櫟陽十四年卒子孝公立十二年作咸陽徙都之十九年天子致伯二十四年卒子惠文君立十四年更爲元年又十四年卒子武王立四年八月死立弟昭襄王十九年爲西帝復去之五十六年卒子孝文王立卽位三日卒子莊襄王立四年五月卒子政立是爲始皇帝

按秦封在岐周以西故列入今地自獻公徙櫟陽始

杜伯史記正義周成王時唐人作亂成王滅之遷唐子孫於杜謂之杜伯卽范丐所云在周爲唐杜氏左傳注杜伯

爲宣王大夫王殺之其子隰叔奔晉

程伯休父詩大雅命程伯休父國語重黎氏後注伯爵休父名詩正義父宜是字而昭以爲名

驪戎男左傳晉伐驪戎驪戎男女以驪姬注其君姬姓其爵男也

蘇忿生書立政周公曰太史司寇蘇公式敬爾由獄以長我王國

張仲詩小雅箋吉甫之友

按小雅皆周西都時作而六月末章云來歸自鎬飲御諸友侯誰在矣張仲孝友則仲必家於西周者也

秦祖史記孔子弟子列傳字子南鄭元曰秦人按明一統志西安府

人宋高宗贊秦有子南贊贊述作守道之淵成德之博範
若鑄金契猶發藥歷世明祀少梁寵爵

壤駟赤史記孔子弟子傳字子徒鄭元曰秦人

按明一統志西安府

人宋高宗贊式是壤侯昭乎聖徒執經請益載道若無詩
書規矩問學楷模得時而駕領袖諸儒

燕伋

按家語作級

三賢集字子思秦人夫子適周問禮時從之

道成而歸居於汧河西南山下相傳古名魯家村宋陳知
微贊八九之徒具傳大義賢哉子思道本無愧鍾靈咸鎬
浴德洙泗增封汧源皇澤斯被聖門人物志贊師席高振
大成是集道傳一貫速肖七十善教云哀儒風可立漁陽

之士得跂而及

芮伯詩小序桑柔芮伯刺厲王也箋芮伯畿內諸侯王卿士也字良夫國語厲王悅榮夷公芮良夫曰夫榮公好專利而不知大難夫王人者將導利而布之上下者也今王學專利其可乎匹夫專利猶謂之盜王而行之其歸鮮矣榮公爲卿士諸侯不享

暴公詩何人斯維暴之云小序刺暴公也暴公爲卿士而譖蘇公蘇公作詩以絕之毛傳暴蘇皆畿內國名

虢文公國語宣王在位不藉千畝虢公諫曰不可夫民之大事在農王事惟農是務三時務農一時講武乃能媚於神而和於民今天子欲修先王之緒而棄其大功置神之祀而困民之財將何以求福用民王勿聽

西漢書卷二十一
按史記周本紀注文公虢叔之後西虢也宣王都鎬在畿內也

左儒說苑周宣王殺杜伯而非其罪左儒爭之於王九復之王曰別君而異友斯汝也左儒對曰臣聞君道友逆則順君以誅友友道君逆則率友以違君王怒曰易而言則生不易而言則死左儒對曰臣聞士不在義以從死不易言以求生臣能明君之過以死杜伯之無罪王殺杜伯左儒死之

家父詩小雅家父作誦以究王訕詩序節南山家父刺厲王也箋家父字周大夫也正義作詩刺王而自稱字者期於申寫下情冀上改悟而已

翟黃新序下邳人魏文侯問曰寡人何如羣臣皆曰仁君也翟黃曰君非仁君何以言之對曰伐中山不以封君之弟而以封君之長子臣以此知之文侯怒逐黃黃出次至任座座曰仁君也何以言之對曰臣聞之其君仁者其臣直向翟黃之言直臣是以知君仁君也文侯復召黃拜爲上卿

甘龍新序秦大夫孝公欲用衛鞅之言恐大臣不從於是召衛鞅甘龍杜摯三大夫慮世事之變計正法之本使民之道公孫鞅曰君亟定變法之慮行之無疑甘龍曰臣聞聖人不易民而教智者不變法而治因民而教者不勞而功成據法而治者吏習而民安之今君變法不循故更禮

以教民臣恐天下之議君願君熟慮之公孫鞅曰智者作法愚者制焉賢者更禮不肖者拘焉拘禮之人不足與言事制法之人不足與論治君無疑矣杜摯曰利不百不變法功不什不易器法古無過循禮無邪君其圖之公孫鞅曰治世不一道便國不必古反古者未可非循禮者未足多君無疑矣於是孝公違龍摯之善謀從衛鞅之過言

樛里子史記名疾秦惠王弟滑稽多智秦人號曰智囊爵右更使伐曲沃取其城地伐趙虜將軍莊豹拔蘭明年助魏章攻楚敗楚將屈匄取漢中地秦封號爲嚴君武王立逐張儀魏章樛里子爲相以車百乘入周周迎之甚敬昭王元年樛里子伐蒲還擊皮氏卒